

四庫全書

子部

欽定四庫全書

山堂肆考卷一百二十三 明 彭大翼 撰

文學

著書 下

姑臧集

唐李德裕有會昌一品集二十卷姑臧集五卷

衡陽記

吳郡顧憲之覲之孫也吳郡人仕南齊為建康令累臨

州郡資無儋石及歸環堵蕭然所著詩文并衡陽記數十篇

國史補

唐李肇著

國秀集

唐天寶三載芮挺章編

甲乙集

唐羅隱字昭諫餘杭人自號江東先生有甲乙集湘南

雜藁傳于世宋楊簡稱慈湖先生亦有甲乙藁

丁卯集

唐許渾字仲晦丹陽人太和六年進士家居丁卯橋有  
丁卯集行世

白氏長慶集

白居易長慶中自中舍出為杭州刺史有白氏長慶集  
七十五卷

元氏長慶集

唐元稹河南人太和間為尚書右丞所著有元氏長慶集百卷

齊東野語

宋周密撰其序曰阜陵天縱睿聖英武果斷其聖政彰彰者備于金匱玉牒嘗得以窺竊其萬一矣其或史臣有所避忌采訪遺落失于紀載不一而足茲以先世見聞及當時諸公所紀錄數事謹書于此以備良史采錄云

漢南真稿

唐溫庭筠字飛卿并州祁人有詩集五卷漢南真稿十卷握蘭金荃等集並傳

朝野僉載

唐張鷟撰

朝野僉言

宋石茂良撰

退朝錄

宋敏求字次道常山人綬子也撰春明退朝錄

明農稿

元汪文璟常山人泰定初進士所著有居朝錄明農稿

河岳英靈集

唐丹陽進士殷璠撰

湖山汗漫集

宋宗室趙孟僎黃巖人常遊歐陽守道劉辰翁之門後為文天祥從事偕行僅五十日而大事已去孟僎遂隱

為道士又為僧因自號三教遺逸子孫遂家華亭所著  
有湖山汗漫集

南部新書

宋錢希白著

東宮舊事

張敞作

渾蓋同歸圖

宋孫義伯豐城人謂治歷當備三法曰象曰器曰數因



作六厯論渾蓋同歸圖又寫古今七十六家法數作大厯賦

淮海閒居集

宋高郵秦觀元祐初蘇軾薦於朝除太學博士國史院編修官坐貶有淮海閒居集

三教珠英

唐李適字子至京兆人武后時修三教珠英適在選中遷工部侍郎又選五經要句

七平讜議

王昌熙寧中舉進士任黔江縣令元豐中景靈宮成昌  
作賦獻之又著七平讜議三江集

明堂制度

李謐十三通詩書尤精厯數又著明堂制度魏文成徵  
拜著作佐郎不就賜號貞靜處士

兵房事類

宋東陽徐次鐸嘗倣周禮作漢官及作唐書傳註中興

兵房事類留之西府

歸田錄

歐陽修作

還山集

元楊奐奉元人元初隱居授徒號紫陽先生以耶律楚材薦拜河南廉訪使所著有還山等集

中興間氣集

唐高仲武編

中興繫年錄

宋李心傳道傳之弟慶元初以薦賜進士為史館校勘  
修中興四朝帝紀後遷著作郎踵修十三朝會要遷工  
部侍郎所著有高宗中興繫年錄學易編春秋考讀史  
考及詩文共數百卷

赤城集

宋寧海羅適所著有易說赤城集

碧池書

唐袁皓宜春人咸通中進士累官集賢殿圖書使自號碧池處士所著有碧池書三十卷

班馬異同

倪思歸安人宋乾道初進士諡文節所著有班馬異同  
濂洛論語

宋劉黻溫州人淳祐中為太學生伏闕上書忤執政送南安軍安置歸別其母母曰為臣死忠以直被貶分也可速行黻至南安盡取濂洛諸書摘其精切之語輯成

書十卷名曰濂洛論語

文心雕龍

梁劉勰東莞人後為沙門名慧地有文心雕龍五十篇  
書成欲取定于沈約無由自達乃負書候約于車前若  
貨鬻者約取讀大重之

墨客揮犀

宋彭乘著

詩苑類格

唐李淑著

藝苑雌黃

唐建安嚴有翼著

冊府元龜

宋太宗皇帝丁時太平以文化成天下既得諸圖籍聚名士于朝詔修三大書曰太平御覽曰冊府元龜曰文苑英華各一千卷至真宗時命盛度與李宗諤楊億王曾李舒雅任隨石中立同編

戚里元龜

宋池州王鉉為中書舍人兼侍講所著有紫薇集春秋  
門例通解戚里元龜易象寶鑑

稗官小說

漢藝文志小說出于稗官注云細米為稗王者欲知閭  
巷風俗細碎之言故立稗官今世謂偶語為稗

稗史集傳

元徐顯撰



鄴中記

陸劇著

湘中記

羅含著又潘岳有關中記

龍城錄

唐柳子厚撰唐名柳州為龍城又蘇子由有龍川志

雉山集

宋青溪人方仲謀嘉祐中進士累官殿中丞所著雉山

集二十卷又宋幽州安次人扈蒙有鰲山集

紫泥集

五代王仁裕天水漢陽人周初遷太子少保所著有紫泥集西江集入洛集

丹淵集

宋文同字與可梓潼人操履高潔以學名世有丹淵集四十卷

西山集

唐施肩吾字希聖睦州人隱洪州西山元和進士有西山集十卷

南郊錄

宋王德延東明人素謹慎事太宗眞宗官至東京都巡檢使所至好撰集近事掌御厨有司膳錄巡皇城有紀事錄從郊祀有南郊錄及治郡有奏報錄

考古圖

宋李公麟字伯時舒州人元祐進士學問博雅多識奇

字自夏商以來鍾鼎尊彝皆能考定世次辯別歟識為  
考古圖黃庭堅謂其風流不減古人呂大臨亦有此圖  
稽古錄

司馬溫公有稽古錄歐陽文忠公晚年自號六一居士  
曰吾集古錄一千卷藏書一萬卷有琴一張有碁一局  
嘗置酒一壺吾老于其間是為六一又蜀郡虞集有道  
園學古集山陰俞宗亨有山林思古錄

鶴林集

吳泳四川潼川州中江縣人宋嘉定進士歷官著作郎  
抗疏直言遷寶謨閣學士歷知溫泉二州所著有鶴林  
集

鴈湖集

宋李燾第三子壁日誦萬餘言寧宗時累官叅知政事  
兼同知樞密院以資政學士致仕卒諡文懿壁文學德  
望轟震一時所著有鴈湖集消塵錄中興奏議內外制  
臨汝書共數百卷

隋唐嘉話

唐彭城劉餗字鼎卿撰

周秦行紀

唐牛僧孺撰

幽閒鼓吹

宋高宗纂唐宋遺事名幽閒鼓吹唐藝文志作張固撰

韻語陽秋

宋丹陽葛常之作

太平廣記

宋王克貞廬陵人南唐進士宋初授太子中允知漢州  
太宗聞其詞學命直舍人院誥命典正預修太平廣記  
古今善言

范泰南北朝宋順陽人撰古今善言二十四篇子暄著  
後漢書

歷代遺論

宋胡仲雲高安人所著有六經蠹測周易見一四書管

窺歷代遺論

兩朝實錄

見史官

希賢錄

宋蔡用之新昌人嘗獻萬言書真宗覽之驚喜其七世孫汝揆號愚泉先生所著有希賢錄貫道集及友議雜書

斥蠹書



宋張庠永新人嘗著片蠹正言二書以排佛老作元經圖以推五行六度之秘鄭獬吳處厚皆師之號白雲先生

著茶經

見隱士

注水經

南北朝涿郡人酈道元字善長魏時為御史中尉執法清刻為時所忌遂遣為關右大使平生好學歷覽羣書

注水經四十卷

漁舟集

宋郭震成都人博學能詩才識過人裕然有物外之志  
所著有漁舟集李旼稱其有孟郊風

虞衡志

宋范成大吳縣人所著有石湖集百三十六卷吳門志  
五十卷使北有攬轡錄駢鸞錄過海有虞衡志出蜀有  
吳船錄

葆光錄

潁川陳氏失其名號龍明子所纂葆光錄無年月無前後見聞奇異事即旋書之因而成編

衍孝編

元楊少愚青陽人所著有孝經衍孝編秋浦集九華外史

味道編

宋陳樸明州奉化人所著有通鑑續編尺牘筌蹄及味

道編雲軒集

緣督集

宋樂安曾幼度乾道中進士仕至太守所著有緣督集  
取莊子緣督以為經之義

源流至論

宋林駟福州府寧德人所著有皇鑑前後集源流至論  
文章正宗

宋真德秀浦城人四歲受書過目成誦所著有文章正

宗

書史續抄

宋劉元高江西高安人淳祐進士所著有漢史意抄書  
史續抄貴華錄三劉家集

文獻通考

宋馬端臨廷鸞之子國亡隱居教授所著大學集傳多  
識錄文獻通考等書

風雅遺音

元熊凱南昌人所著有風雅遺音小學入門等書

經典徽言

宋孫奭字宗古真宗朝為給事中掇五經中切于治道者為五十篇名曰經典徽言

述征記

郭緣生作

輟耕錄

天台陶宗儀字九成元末隱居華亭負經世之學所著

有說郭南村輟耕錄

呂忱字林

呂忱晉弦令也著字林

東坡志林

蘇東坡著易書傳論語說志林奏議內外制數百卷

劉公嘉話

唐常絢字文明集劉禹錫語一卷曰劉公嘉話

遜齊閒覽

宋陳正敏公著

通鑑外紀

宋劉恕渙之子筠州高安人所著有十國紀年通鑑外紀等書

通鑑前編

金履祥景文曾孫蘭陵人宋末以史館編修召不及用而國亡遂隱居著書所著有大學疏義尚書表註通鑑前編論孟考證中庸標註



致堂管見

宋胡寅字明仲號致堂文定季子建炎中拜起居郎諸子嘗侍坐數盃之後歌孔明出師表誦陳了翁奏章可謂豪傑之士也謫戍新州著讀史管見二十卷

沈括筆談

宋沈括字存中吳興人所著有筆談及律樂醫卜諸家皆有論述

事物紀原

書凡十卷紀事一千八百四十有一作者逸其姓氏不可考或曰高承所作出雲谷雜記但不知何時人

師友紀聞

宋濟南李廌字方叔著

山川地里圖

宋休寧人程大昌紹興中進士古今事靡不考究所著有禹貢論及易老通言攷古編演繁露北邊備對又為山川地理圖就經筵進呈

典章文物志

唐李淳風著

漁隱叢話

宋胡仔字仲任自號苕溪漁隱所著有漁隱叢話仲任

一作元任

山樵雜錄

元鄭元祐撰遂昌山樵雜錄

文選

東漢王逸字叔師集屈原以下迄劉向之文晉摯虞繼  
為文章流別梁昭明太子祖述之以為摠集名曰文選  
韻書

宋虞似良寓居黃岩自號橫溪老樵有篆隸韻書行世  
家範

元鄭太和十世同居凡二百四十年于冠婚喪祭必稽  
文公家禮而後行所著家範三卷

朝儀

何承天郟人寓居丹徒劉宋時拜祠部郎撰朝儀遷中丞

千文

梁武帝敕諸王書令殷鐵石于鍾王書中選一千字不重者召周興嗣曰卿有才思為我韻之興嗣一夕編綴進上鬚髮皆白宋劉後村曰法帖中漢章帝已嘗書此文殆非梁人作也又米芾為博士嘗奉詔以黃庭堅小楷書作千字文以獻見太常博士

六帖

唐白樂天宋孔傳著名曰白孔六帖

帝王世紀

晉皇甫謐字士安博綜典籍百家之言時謂之書淫號  
玄晏先生所著有帝王世紀子方回少有文才

宇宙略紀

宋車若水東巖人博學工古文自號玉峰山民所著有  
宇宙略紀玉峰冗藁

靈臺秘苑

南北朝庾季才新野人梁湘東王引授外兵叅軍累遷  
中書郎封宜昌縣伯所撰有靈臺秘苑及垂象志等書  
韻海鑑源

唐顏真卿為湖州府刺史招致名儒著韻海鑑源三百  
六十卷

盈川集

唐楊炯中童子科授校書郎年十一待詔弘文館武后

朝與宋之間分直藝館終于盈川令所著有盈川集

長江集

唐賈島大中間為長江尉所著有長江集

齊諧志

莊子曰齊諧志怪者也諧之言曰鵬之徙南溟也水擊三千里搏扶搖而上九萬里梁吳均有續齊諧記

注君通

漢注丹南陽府涇陽人世傳孟氏易建武初為博士遷



大鴻臚作易通論七篇世號注君通

金陵遺事

宋朱舜庸建康人嘗編金陵遺事積二十年自里巷口  
傳仙佛之書無不研綜慶元中留守吳琚為之銓次目  
曰續建康志

玉堂雜記

宋周必大撰又僧文瑩有玉壺清話

宣公奏議

唐陸贄字敬輿諡宣公

東萊博議

宋呂祖謙字伯恭號東萊娶後一月不出閨人謂其色荒也及出乃成左氏博議一帖

唐文粹

吳興姚鉉集唐人所為古賦樂章歌詩贊誦碑銘文論箴表傳凡百卷名文粹後鉉謫居連州嘗寫所著文粹一百卷好事者建樓貯之官屬多遣吏寫錄吏以為苦

以鹽水喫之冀其速壞後以火焚其樓

宋文鑑

呂伯恭編皇朝文鑑凡五例朱文公嘗與伯恭書云文鑑條例甚當但一種文勝而義理乖僻者恐不可取其佛老文字恐須如歐陽公登真觀記曾子固仙都觀菜園寺之屬乃可入其他贊邪害正者文詞雖工恐皆不可取也

文藪

唐皮日休編又宋豐城人徐鹿卿所著有谷泉文集及手編漢唐文類文苑菁華等書

策林

白樂天編

荀勗中經

晉荀勗即荀勗字公曾晉武朝領秘書監得汲冢中古人竹書詔勗撰次之以為中經列在秘書省

才邵法語

宋大觀中劉才邵為汝州教授嘗憤五季文詞卑弱倣揚雄法言著法語八十一篇

後山談叢

宋陳師道字無已號後山居士

啖助例統

啖助趙州人唐天寶末調臨海尉善為春秋考三家短長號集傳復攝其綱條為例統助卒其門人陸淳趙匡與其子異哀錄助所為損益而纂會之號纂例

承天纂文

何承天著承天東海郊人博通古今

孫何駁史

孫何宋汝陽人篤學好古景德初知制誥所著有駁史

四十餘卷

開元初譜

唐常述京兆萬年人家儲書二千卷述為兒時登上第  
開元初與諸儒即秘書省續七志又撰唐春秋三十篇開

元初譜二十篇

皇祐續稿

宋李觀建昌南城人文章自成一家皇祐間范仲淹薦試太學助教除說書既卒鄧潤甫上其退居類藁皇祐續稿詔官其子參魯又曾鞏有文集曰元豐類藁五十卷外集十卷所為文字開闔馳騁應用不窮然言近指遠要其歸必止于仁義

四聲指歸

隋劉善經河間人所著有酬德傳三十卷諸劉譜三十卷四聲指歸一卷

四聲韻譜

梁沈約字休文左目重瞳子腰有紫志所著晉書一百卷宋書齊記梁武記若干卷又撰四聲韻譜自謂在昔詩人累千載未及作而獨得其妙又屬詞比事往往成編為證古類事此後人類事書所由起也

西域傳



班固作

東溪集

宋黃亢浦城人嘗遊錢唐以詩贈林逋時杭守王隨奏禁西湖為放生池亢作詩數百言以諷士人傳誦之有東溪集二十卷

灌園集

宋呂南公建昌南城人熙寧中一試禮闈不偶即退而築室灌園益肆力于學絕意進取所著有灌園先生集

元豐中陳繹以翰林學士出知建康軍賓禮南公為諸  
儒倡每謂人曰吾不以左官為不可意而獲一灌園先  
生其榮多矣

登瀛集

宋楊佖析津人弱冠聲名籍甚統和中進士第一累官  
至吏部尚書中書門下平章事事總大綱人樂為用所  
著有登瀛集

梁竦七序

東漢梁竦字敬叔松弟也著書名七序班固見而稱之  
曰孔子著春秋而亂臣賊子懼梁竦作七序而尸位素  
殮者慙

劉載五論

劉載范陽人宋太宗朝以工部侍郎致仕嘗著五論曰  
為君為相為將去讒納諫為七流所稱又唐劉迅字捷  
卿知幾第五子也續詩書禮樂春秋五說既成語人曰  
天下滔滔知我者希終不以示人

晉陽秋

見秘書監

蜀檣杙

宋張唐英編蜀王建等事也

北夢瑣言

宋富春孫光憲著

西清奏講

宋晉江陽從易好學強記喜別白是非多面折人所著有

泉山集中書制藁西清奏講又蔡條字伯衲著西清詩話  
益部耆舊傳

晉陳壽字承祚為著作郎撰三國志益部耆舊傳

漢中耆舊傳

祝龜南鄭人劉焉為益州牧辟之後撰漢中耆舊傳

因話錄

唐趙璘之作宋梁周翰有續因話錄

即色論

世說支道林造即色論示王中郎坦之中郎都無言支  
曰默而識之乎王曰既無文殊誰能見賞按維摩經曰  
文殊師利問維摩詰曰何者見菩薩入不二法門維摩  
詰默然無言文殊師利嘆曰是真入不二法門也

### 五臣注

唐呂延祚以李善注文選為繁冗乃集呂延濟劉良張  
詵呂向李周翰之說為五臣注後合善與五家為一至  
蘇軾謂五臣乃俚儒之荒陋者反不如善後人刪去之

獨留善注

八賢論

晉謝萬作八賢論叙漁父屈原季主賈誼楚老龔勝孫  
登嵇康為四隱四顯其旨以處者為優出者為劣以示  
孫興公孫以為體公識遠者則出處同歸時以興公議  
為得又唐李邕撰六公咏

高識傳

唐太史令傳奕年八十五卒臨終戒其子無得學佛書

又集魏晉以來駁佛教者為高識傳十卷行于世

極玄集

唐姚合選唐詩二十三家為極玄集

却歸編

宋徐度作

請盟錄

宋陳堯叟偉姿貌奏對明辯又典機密軍馬之籍悉能

周記所著有請盟錄



百僚新戒

唐高宗上元中天后多引文學之士元萬頃劉禕之等  
使撰列女傳臣軌百僚新戒樂書凡千餘卷

九朝通略

宋熊克字子復遠之孫建陽人哲宗朝舉進士著書有  
九朝通略中興小歷官制新典帝王經譜其壻王克勤  
狀其行實文有顏延之錯綜之工史有陳壽叙事之長  
牧民得曹參清靜之旨制行適徐公通介之常

真偽傳

宋文帝時尚書令何尚之以老致仕退居方山議者咸謂其不能固志既而詔書敦諭數四果起視事袁淑錄自古隱士有迹無名者為真偽傳以嗤之

忠義傳

宋喻良能字叔奇淳熙中為國子監簿進忠義傳起於戰國王蠟終於五代孫晟上下一千一百年所取一百九十人凡二十卷

諫垣存藁

宋楊丙晉江人累遷刑部侍郎中書舍人所著有西掖藁及諫垣存藁韓魏公亦著此藁

中書備對

宋畢仲衍字夷仲世長之曾孫也元豐中除中書舍人撰中書備對二十卷

諸史通考

宋丁明金壇人閉門讀書二十年手編事類及諸史通

考等書百餘卷

五行新書

宋董濬德興人累遷秘書監建炎中進興治綱領圖中興四議出為江西提刑後致仕所著又有五行新書及周官辨疑等書

春陵小雅

宋曾極臨川人志氣豪放朱子得其書及詩大異之所著有春陵小雅金陵百詠

曲洧舊聞

宋朱弁著

十三代史略

宋池州人夏鴻與弟鵬撰十三代史略後以辟為團練  
推官胡一桂號雙湖所著有周易本義十七史纂要廬  
陵魯先之進士及第居國子監編十九史略鄱陽松塢  
王逢注但魯與王不知何代人

十六國春秋

崔鴻光從子南北朝魏人為尚書都兵郎中弱冠有著  
述志撰十六國春秋共百卷遷平州刺史卒諡貞

言行錄

歐陽永叔著

徵祥記

何法盛著

玉壺清話

宋僧文瑩著

玉堂閒語

五代王仁裕著

史記索隱

司馬貞河內人唐朝散大夫所著有史記索隱三十卷

策學提綱

祝堯元上饒人博學能文中進士為江山尹所著有大易演義策學提綱

楚詞章句

東漢王逸所著有楚詞章句注漢詩一百二十三篇

漢官禮儀

東漢應奉子劭為泰山守曹操專政棄官歸作春秋斷獄二百五十篇獻帝召為軍謀校尉著漢官禮儀又胡廣有漢官儀

芝田錄

唐丁用晦著

桐川集



宋沈虛中廣德人歷官吏部尚書所著有左傳國語要略十卷國史要綱三十卷桐川集三卷

幼童傳

劉昭南北朝高唐人晉太尉實九世孫著幼童傳

孝子傳

蕭廣濟宋躬鄭緝各有孝子傳

瑞應圖

孫柔之著

道德論

任嘏著

先友記

柳子厚著又范攄著雲溪友議

高僧傳

梁釋慧皎著

青谿類藁

宋汪革字信民臨川人嘗謂人嘗咬得菜根斷則百事

可做所著有青谿類藁及論語直解

青箱雜記

宋邵武人吳處厚著

對越集

宋豐城人范應鈴號西堂著西堂雜著及對越集

著存集

宋高定字子嘉泰初進士稼之弟博通六經所著有著存集及北門類藁

張子卮言

宋張汝明廬陵人性至孝所著有易索書張子卮言

韓公遺事

宋韓忠獻公遺事強至編王文正遺事男素編

魏臺訪議

高堂隆著

宋朝職略

宋鄒補之開化人累官江寧府通判所著有兵書解及

宋朝職略等書

列仙傳

葛仙翁著又葛洪有神仙傳

總仙記

宋樂黃目知黃州獻廣孝傳五十卷總仙記一百四十卷

蘇洵諡法

宋蘇洵年二十七始發憤為學遂通六經百家之說韓

琦奏于朝除校書郎尋以文安簿修纂禮書所著有文集二十卷諡法三卷

劉熙釋名

漢劉熙字成國撰天地陰陽四時邦國都鄙車服喪紀下及民庶應用之器論叙指歸謂之釋名凡二十七篇

南越志

沈懷文著南越志

南徐志

山謙之著南徐州志

魏典三十篇

唐元澹博學通故訓及進士第授太常少卿以系出拓拔恨史無編年乃撰魏典三十篇事詳文略學者尚之

晉紀二十卷

晉于寶詔為著作郎以家貧求補山陰令遷始安太守著晉紀二十卷直而能婉咸稱良史

山堂肆考卷一百二十三

欽定四庫全書

子部

山堂肆考卷一百二十四

詳校官中書臣閔思毅

主事臣祁韻士覆勘

總校官降調編修臣倉聖脉

校對官中書臣王鍾泰

謄錄監生臣趙希濬



欽定四庫全書

山堂肆考卷一百二十四 明 彭大翼 撰

文學

藏書

魚豢典略云香辟蠹故藏書臺稱云臺閣稱云閣又  
柳文其為書處則充棟宇出則汗牛馬

孔壁

見壁

惠車

莊子曰惠施多方其書五車其道舛駁其言不中又世說司馬太傳問謝車騎惠子其書五車何以無一言入玄謝曰故當是其妙處不傳按惠施戰國時人為梁相與莊子友善

幽經秘錄

東漢學者稱東觀為老氏藏室道家蓬萊山鄧康遂薦竇章入東觀為校書郎注云老子為守藏吏復為柱下

史四方所記文字皆歸柱下蓬萊海中神山為仙府幽經秘錄皆在焉

牙籤錦帕

西京雜記秘閣圖書皆表以牙籤覆以錦帕

鄴架

唐李鄴侯泌起書樓積書三萬餘卷經用紅牙籤史用綠牙籤子用青牙籤集用白牙籤韓退之詩云鄴侯家多書插架三萬軸一一皆牙籤新若手未觸

申莊

壽張申屠致遠仕元為廉訪僉事清修苦節恥事權貴  
聚書萬卷號曰申氏墨莊

金帛招求

漢河間王以金帛招求四方美書多與漢室等

江淮括訪

唐元載為相奏以千錢購書一卷又命拾遺苗發等使

江淮括訪

曹氏書倉

拾遺記魯人曹曾本名平慕曾參之行改名曾家多書及世亂曾慮先文湮滅乃積石為倉以藏書世謂曹氏書倉

田氏書樓

唐田弘正為魏博節度使封沂國公樂聞前代忠孝之事于府舍起書樓聚書萬餘卷視事之隙與賓佐講論古今賢行可否後周張昭遠積書萬卷以樓藏之宋孫

朴字夢得者山人六世祖長孺喜藏書為樓置其中蜀人謂之書樓孫氏

藏諸名山

見史官

藏于故居

蘇子瞻李氏山房藏書記余友李公擇少讀書于廬山五老峯下白石菴之僧舍公擇既去而山中之人思之指其所居為李氏山房藏書凡九千餘卷以遺來者供

其無窮之求而各足其才分之所當得是以不藏于家而藏于故居之僧舍此仁者之心也

載書三十乘

晉張華好書籍身死之日家無餘財惟有文書溢于几篋嘗徙居載書三十乘秘書監摯虞撰定官書皆資華本以取正焉天下奇秘世所未有悉在華所由是博洽無與比又唐元行沖乃韋述父景駿之姑子也嘗載書數車自隨

寫書數十篋

齊沈麟士手寫細書數十篋

壁藏律令

漢沛國陳咸以律令為尚書見何武鮑宣死即乞骸骨  
去職王莽篡位召咸為掌冠大夫咸謝不肯應三子參  
豐欽皆在位咸悉令解官歸鄉里閉門不出入收斂其  
家律令書文壁藏之

帳搜論衡



枹朴子曰人疑蔡邕得異人書搜其帳中果得王充論衡數卷持去邕丁寧之曰唯我與爾共之勿廣也

聚書數百卷

魏志王脩家不滿斗斛聚書至數百卷

得書八萬卷

梁金樓子聚書四十年得書八萬卷河間之侔于漢室頗謂過之唐蘇弁字元容聚書二萬卷手自讎定宋賀鑄字方回知章之後開封人藏書萬卷長于樂府有慶

湖遺老集行于世

請俸寫書

唐杜暹聚書萬卷每卷後題云請俸寫來手自校子孫讀之知聖教幣及借人為不孝

盡資置書

宋丁度祖顓盡其家資置書八千卷且曰吾聚書多矣必有好學者為子孫度後登詞學科官至叅政

掌于蘭臺

百官表秦御史大夫有兩丞一曰中丞在殿中蘭臺掌  
圖籍秘書

侔于祕府

宋錢惟演字希聖文章與楊億劉筠齊名嘗曰學士備  
顧問不可不該博故其家聚書侔于祕府

子弟看書

唐倪若水字子泉藏書甚多子弟直日看書有借書者  
先束脩投贄然後與之

女婿盜書

見婦翁女婿

曹誠書院

宋應天府民有曹誠者即戚同文舊居廣舍百五十楹聚書千餘卷以延學者真宗嘉之賜名應天府書院

務觀書巢

宋陸游字務觀作書巢記曰陸子既老且病猶不置讀

書名記室曰書巢客有問曰上古有巢氏是為未有宮  
室之巢堯民病水而為巢是為避害之巢前世大山窮  
谷中有學道之士棲木若巢是為隱居之巢今子幸有  
屋以居戶牖牆垣猶之此屋也而謂之巢何耶陸子曰  
子之辭辨矣顧未知吾室吾室之內或栖于櫝或陳于  
前或枕藉于牀俯仰四顧無非書者吾飲食起居疾疴  
呻吟未嘗不與書俱賓客不至妻子不覲雨風雷電之  
交有不知也間有意欲起而亂書圍之如積稿枝或至

不得行則輒自笑曰此非吾所謂巢者耶乃引客就觀之客始不能入既入不能出乃又大笑曰信乎其似巢也客去陸子嘆曰天下之事聞者不如見者知之為詳見者不如居者知之為盡吾儕未造夫道之堂奧自藩籬之外而妄議之可乎因書以自警

好畜古文

宋歐陽公平生於物少所好惟收畜古文圖書集三代以來金石刻一千卷以校正史傳百家訛謬之說

喜藏異書

宋宋綬字公垂博學喜藏異書手自讎校嘗謂校書如  
掃塵一面掃一面生每三四校猶有脫誤又曾鞏平生  
好書家藏一萬餘卷手自讎對白首不倦

六經閣

宋張伯玉吳郡州學六經閣記六經閣諸子百家皆在  
焉不書尊經也吳郡州學始由高平范公經緝之至今  
尚書富即中十年更入政學始大成而成年六經閣又

建祈于久故爽而不卑酌于道故文而不華經南向史  
西向子集東向標之以油素揭之以油黃凡天地之極  
致皇王之高道生人之紀律舉在是矣

萬卷堂

蘇子瞻題張競辰所居萬卷堂詩君家四壁如相卷  
藏天祿吞石渠豈惟鄴侯三萬軸家有世南行秘書

取于六丁

見經術



藏于二酉

大酉小酉山多藏秘書故今藏書室名二酉云

藏之秘府

漢景帝末年募求天下遺書藏之秘府

借于民間

唐玄宗幸東都議借民間異本傳錄及還京師置修書院

建藏書府

漢武帝建藏書之府置寫書之官及諸王子皆充祕府  
構貯書屋

隋煬帝於東都觀文殿東西廂構屋貯書東屋藏甲乙  
西屋藏丙丁

劉向校定

漢成帝使謁者陳農求天下遺書詔光祿大夫劉向等  
校定每一書向輒條其目據其指意錄而奏之

班固典掌

漢光武中興日不暇給而入洛之書二千餘兩後藏于東觀及仁壽閣命校書郎班固傅毅等典掌之

送于平城

魏道武命郡縣大收書籍悉送平城

藏于內庫

唐貞觀中魏徵虞世南顏師古繼為秘書監請購天下遺書選五品以上子孫工書者為書手繕寫于內庫以宮人掌之玄宗時兩都各聚書四部以甲乙丙丁為次

列經史子集四庫其本有正副軸帶帙籤皆異色以別之祿山之亂尺簡不存至文宗時鄭覃進言經籍未備因召秘閣搜訪于是四庫之書復全分藏十二庫及黃巢之亂存者蓋尠又按景龍文館記薛稷知集庫馬懷素知經庫沈佺期知史庫武平一知子庫通曰四庫書

募民獻書

後唐莊宗募民獻書及三百卷授以試銜其選調之官每百卷減一選

選官正書

周世宗銳意求訪凡獻書者悉加優賜以誘致之如有訛舛乃選常參官校讎刊正令于卷末署其名銜

計帙授秩

後漢乾祐中禮部郎司徒調請開獻書之路凡儒學之士衣冠舊族有以三館亡書來上者計其卷帙賜之金帛數多者授秩

計卷與官

宋仁宗嘉祐中詔中外士庶並許上館閣闕書至五百卷與文資官

搜討異本

隋文帝分使人搜討異本每書一卷賞絹一匹校寫既完本即歸主

購募亡書

宋太祖乾德中下詔購募亡書涉弼彭幹等詣闕獻書千二百二十八卷詔分置書府弼等並賜科名

立崇文院

宋太宗初置三館于長慶門北謂之西館帝臨幸惡其陋命有司于昇龍門東北勅立三館至太平興國三年三館成賜名崇文院遷西館書貯焉凡八萬卷後又就崇文院中堂建秘閣分三館書置其中

建清心殿

太宗又于禁中建清心殿收藏圖籍以資觀覽

諭旨訪求

宋徽宗宣和中詔郡縣諭旨訪求秘書于是榮州助教張頤及李東所進之書皆繫闕遺詔頤進士出身東補迪功郎

抵家就錄

高宗渡江獻書有賞或官有家藏者命抵家就錄有鬻者悉市之

篤學

禮記玉不琢不成器人不學不知道



周公朝讀書

周公朝讀書百篇夕見士七十五人

孔子晚讀易

孔子晚喜易讀之韋編三絕鐵摘三折漆書三滅編所以聯次簡也言愛玩之甚故編簡之韋為之三絕也

刺股

蘇秦與魏國張儀同事鬼谷先生讀書欲睡以頭髮繫梁上手引錐自刺其股血流至踝

懸頭

東漢孫敬字文寶常閉戶讀書睡則以繩繫頭髮懸之梁上嘗入市人見之皆曰閉戶先生來也又編柳以寫經

三年不窺園

漢董仲舒下帷發憤潛心大業三年不窺園圃人不見其面

十年不出戶

北史劉炫字光伯與信都劉焯閉戶讀書十年不出

護雞讀書

東漢高鳳字文通自旦讀書至夜不息妻曝麥于庭令  
鳳護雞時暴雨至鳳讀書不覺水漂其麥

囊螢照書

晉車胤字武子精勤博覽家貧無油夏夜以練囊螢火  
數十以照書

帶經而鋤

漢倪寬千乘人授業孔安國帶經而鋤

懷筆而寢

東漢曹褒字叔通常慕叔孫通制漢禮儀晝夜沉思寢則懷鉛筆行則誦文書當其念至忽忘所之

匡衡穿壁

見壁又衡以邑有大姓家富多書每與傭作不求價主人怪問之答曰願得主人書徧讀之主人感悟遂給以書

祖瑩塞牕

後魏祖瑩字元珍性耽書父母恐其成疾禁之不能止  
常藏火灰中候父母寢後燃火讀書又以衣被蔽塞牕  
戶恐漏光明為家人所覺

為傭讀書

東漢桓榮字春卿習歐陽尚書事博士九江朱普家貧  
常為傭讀書叔父曰家貧如此讀書何為榮奮志不改  
十五年不窺家園

謝客讀書

唐陳子昂字伯玉始以豪家子任俠使氣至年十七八未知書常與博徒游後入鄉學慨然立志謝絕門客專精經典數年之間無不該覽

映雪讀書

晉孫康字伯翳太原人家貧無油冬月常映雪讀書

映月讀書

宋陸佃字農卿山陰人家貧苦學映月光讀書

求免貧賤

呂氏春秋甯越少時苦耕友人謂曰君學三十年可免  
貧賤越曰他食吾不食他寢吾不寢如此十五年可以  
成矣

可澆塵俗

宋黃山谷與人書曰每相聚輒讀前漢書數集甚佳人  
胸中久不用古今澆灌則塵俗生其間照鏡則面目可  
憎對人亦語言無味

截蒲學書

漢路溫舒牧羊于大澤中截蒲以學書太守見而奇之

坐牀讀書

魏管寧字幼安朱虛人家貧好學坐藜牀五十年當膝處皆穿

牧羊竊學

漢王尊字子贛涿郡高陽人少孤歸諸父使牧羊澤中尊竊問學能史畫又晉王育字伯春為人牧羊好學亡



其羊羊主責之賣身以償同郡許子章聞而嘉之給以衣食使與其子同學遂博通經史後為武陽令

### 乘牛掛書

唐書李密字元邃嘗欲尋包愷乘一黃牛被以蒲羈將漢書一帙掛牛角翻讀之尚書令越公楊素見于道問曰何處書生耽學如此密乃下拜自言姓名越公問所讀何書答曰項羽傳也因大奇之

### 書淫

晉皇甫謐字士安安定人漢太尉皇甫嵩之曾孫因承繼叔父徙居新安年二十不好學人以為癡後叔母任氏訓戒乃感激就鄉人席坦受書帶經而農遂博綜典籍百家之言人謂之書淫又唐竇威字文蔚貫覽羣書家世貴顯子弟皆喜武力威獨尚文諸兄詆為書癡

傳癖

晉杜預功成之後耽思經籍作春秋左傳集解嘗對武帝曰臣有左傳癖

升屋讀書

齊江泌少貧夜隨月光讀書月斜則握卷升屋以盡餘光

走廁挾書

宋謝希深嘗言宋公序同在史院每走廁必挾書以往諷誦之聲琅然聞于遠近

燎麻炬讀書

梁劉峻字孝標燎麻炬以讀書或昏睡致焚其鬚

燃松節讀書

南北朝顧歡鹽官人家貧無以受業每于舍後聽人誦書無遺亡者夕則燃松節讀書有孝行母亡水漿不入口者七日南齊高帝召為太學博士不就唐畢咸燃薪讀書

以杖自擊

梁沈峻好學臨欲睡以杖自擊以驚之

以鐘為限

南史丘仲孚字公信少好讀書以中宵鳴鐘為限叔父  
靈鞠稱為千里駒

織簾讀書

齊沈麟士家貧織簾讀書手口不輟號織簾先生後居  
相位歸養其親人號曰織簾相公來也

燃荻讀書

顏氏家訓梁世彭城劉綺交州刺史勃之孫早孤家貧  
常無燈折荻尺寸燃之讀書義陽朱詹世居江陵家貧

無資累日不爨時吞紙以實腹寒無氈被抱犬而卧犬亦饑虛起行盜食呼之不至哀聲動鄰猶不廢業卒成大儒

仕不釋卷

五代范質字文素自徙仕以來未嘗釋卷人或問之答曰昔嘗有異人與吾言他日必當大用苟如是言無學術何以處之

老不去書

宋洪興祖字慶善自少至老未嘗一日去書嘗作程瑀  
論語解序引不使大臣怨乎不以秦檜以為譏已編管  
昭州

晝夜不釋卷

梁沈約少孤讀書晝夜不釋卷母恐其勞生疾常為之  
減油滅火

寒暑不釋卷

唐蔣乂結髮志學至老不厭雖甚寒暑卷不釋手

懷餅讀書

郭宣徽達少時日懷二餅讀書于京師西樓上饑即食餅沽酒一升飲之再讀書抵暮始歸日以為常

畫粥讀書

見貧士

枕上作文

宋錢思公謂謝希深曰余平生所作義多在三上謂馬上枕上廁上也蓋惟此處可以屬思耳又嘗語僚屬曰



一生唯好讀書坐則讀經史卧則讀小說上厠則閱小詞未嘗頃刻釋卷也

帳中肄業

范文正公少時多延賢士胡瑗孫復石介李覲之徒與之游晝夜肄業帳中夜分不寢後公貴夫人李氏收其帳頂如墨色時以示諸子曰爾父少時勤學燈煙跡也公有四子純佑純仁純禮純粹

彭年篝燈

宋陳彭年幼好學母以一子特所鍾愛禁其夜讀彭年  
篝燈密室不令母知

溫公警枕

司馬溫公以圓木為警枕少睡則枕轉而覺乃起讀書  
不欲休卧

春秋時甯越中牟人問其友何以免耕稼之苦其友曰  
莫如學學三十年則可以免越請用十五年人將休吾  
不休人將卧吾不卧學十五歲而周威王師之

不暇寢食

後魏李彪家世寒微高悅家富典籍彪于其家手抄口誦不暇寢食

劉向精思

劉向專精思于經術晝則誦書夜觀星宿

李鉉假寐

北齊李鉉家素貧春夏務農冬乃入學三冬不畜枕每睡假寐而已

不事盥櫛

唐虞世南與兄世基同受學于顧野王十餘年精思不懈至累旬不盥櫛

不解衣衾

宋方漸知梅州所至以書自隨積至數千卷皆手自竄定就寢不解衣衾林光朝質之答曰解衣擁衾會有所檢討則懷安就寢矣增四壁為閣以藏其書榜曰富文

五十執經

唐宗室則之嗜學年五十餘尚執經太學

八十校書

見耆英

終日不出山巖

唐崔從少孤貧寓居太原與仲兄同隱山林苦心力學屬歲兵荒至于絕食飲水棲衡而講誦不輟怡然終日不出山巖如是者十年

經年不出墅門

唐裴休兄弟同學于別墅經年不出墅門晝課經籍夜課詩賦

休澣不廢書

唐裴炎補弘文生每休澣他生或山遊炎讀書不廢

倥偬不去書

唐馬總入為戶部尚書雖吏事倥偬書不去前論著頗多

不告勛勤

柳宗元送班孝廉序研精典墳不告劬勩

不答候問

魯平字叔陵好學不倦不答候問之禮友以此短之平欣然自得時人語曰五經復興魯叔陵

貴顯讀書

唐杜佑性嗜學雖貴顯猶夜分讀書

顛沛著書

唐李德裕以器業自負好著書雖位極台輔而讀書不

輟初貶潮陽在蒼黃顛沛之中猶留心著述

避難閱肆書

徐文遠避難長安家貧無以自給其兄休鬻書為業文遠日閱書于肆博覽五經尤精春秋左傳

為吏讀院書

唐陽城字亢宗性好學貧不能得書求為吏隸集賢院竊院書讀之晝夜不出戶者六年無所不通

被濯開經



唐蕭德言晚節學愈苦每開經輒被濯束帶危坐妻子  
諫曰老人何終日自苦如此答曰對先聖之言何敢憚  
勞

感激力學

趙武孟少遊獵以所獲餽其母母泣曰汝不好學而傲  
蕩吾安望哉不為食武孟感激遂力學淹該書記

亡失衣冠

東漢朱穆字公叔耽學專精銳意講誦或時思至不自

知亡失衣冠顛墜阡岸其父以為顛愚幾不知馬之幾足

不越戶限

宋張九成字子韶八歲通六經大旨十四游鄉校閉閣讀書寒折膠暑爍金不越戶限比舍穴隙以視則斂膝危坐對置大編若與神明為伍

山堂肆考卷一百二十四